

Ես ուզեցի զբաղեցնել նրանց:

– Դուք ունեք շատ աղախիսներ, – ասեցի ես, – Էլ ինչո՞ւ եք ինքներդ այսքան նեղութիւն քաշում:

– Մենք խօ հիւանդ չենք, – պատասխանեց Թութին, – որ հանգիստ պառկենք ու ոչինչ չշինենք:

– Աղախիսն էլ ունի իր գործերը, – պատասխանեց միւսը ավելի խոհեմ կերպով:

– Ընկերիդ որտե՞ղ ես թողել, – հարցրուց Թութին:

Ես իմացայ, որ Ասլանի մասին է հարցնում:

– Քո հօր հետ գնացել եմ, չեմ իմանում որտեղ:

– Նրա սրտում սատանայ է նստած, դու գիտե՞ս, – հարցրուց Թութին բարկացած ձայնով:

– Ինչո՞ւ ես այսպէս խօսում, խենթ, – զգուշացրեց նրան տիկինը եւ սկսեց կշտամբել: – Ասլանը շատ լաւ տղայ է:

– Բայց ծիւնի պէս սառն է նա:

– Ինչո՞ւ, նրա՞ համար, որ քեզ հետ սիլի-բիլի (սեթւեթ) չե՞՞ անում:

Այս երկուսի վիճելուց ես իսկոյն հասկացայ Թութիի ատելութեան պատճառը դէպի Ասլանը: Երեւում էր, խղճալի աղջիկը սիրում էր նրան, եւ սառնասիրտ, անգութ Ասլանից մերժած էր եղել: Բայց Թութին չհանգստացաւ տիկնոջ խօսքերով, եւ ավելի բարկանալով ասաց.

– Ես մի՛շտ կասեմ, նրա սրտում սատանայ է նստած. նա խիղճ չունի. դրա համար էլ ոչ մի աղջիկ նրան լաւ տղամարդ չի ասի...

Ես նկատեցի նրա աչքերի արտասուքը. նա էլ չսպասեց, ամէն իր սափորը եւ սկսեց դիմել դէպի վրանները:

Նրա գնալուց յետոյ տիկինը ինձ պատմեց, թէ մի օր բեկի վրանում մի քանի քուրդ իշխաններ ժողով են ունեցել, նրանց մէջն է եղել եւ Ասլանը: Ժողովի խորհրդածութիւնը հասել է տաք վիճաբանութեան, որի մէջ Աբդալլահի որդի Ահմէն խօսքով վիրաւորել է Ասլանին: Այս Ահմէն նշանաւոր էր քրդերի մէջ իր ժանտ բնաւորութեամբ եւ միեւնոյն ժամանակ իր տարօրինակ ուժով: Ասլանը չէ համբերում, յարձակւում է նրա վրայ, եւ երեխայի նման կաշկանդելով, խլում է ժողովի միջից, եւ վրանից դուրս քարշ տալով, կամենում է սպանել նրան: Ժողովի բոլոր իշխանները վրայ են թափւում, հազիւ կարողանում են ազատել վիթխարի Ահմէն Ասլանի ձեռքից: Թութին տեսնում է այս